



DEO OPTIMO MAX.

UNI ET, TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA,*

QUOD LIBETARIIS DISPUTATIONIBUS,
*manè discutienda in Scholis Medicorum, die Jovis trigesimâ
mensis Decembris, Anno Domini M. DCC. LXII.*

M. CAROLO SALLIN, Doctore
Medico, Præsides.

An præcipuum respirationis organum Diaphragma?

I.



PIRARE vivere est. Quot ex aëre veniunt spiranti com-
moda! Aëris beneficio odorifera corporum effluvia fursum
evahuntur, nervorumque olfactoriorum expansiones titillando,
gratissimas procreant sensationes: mediante aëre vibrantur
soni, variis modulationibus vox edita, cogitationum interpres,
societatis dulcedo, scientiæ nuncia, commercii vinculum,
cariorem reddit vitam. Sed majora manent; aër enim variis commixtus

* M. J. B. L. CROMEL Auctore, anno 1732.

2

cibus ventriculum subit, digestioni favet, chyloque viam sternit. Aër per tracheam arteriam ingressus, (ampliato thorace, pulmonalibus vesiculis explicatis,) virtute quâ pollet elasticâ, fibrarum excitat oscillationes, vasa sanguinea premit, sanguinem fortiter protrudit, ferique abundantior copia, sub halituosâ transpirationis specie, avolat in auras. Pulmonalis hæcce perspiratio, circulationis vindex, sanguinem defœcat, eumque rubicundiores reddit, dùm globulosa pars uberiori non proluitur sero. Maxima tandem sunt respirationis commoda, cùm Natura sedula parens, pulmonibus unum cordis ventriculum, alterum verò cæteris omnibus corporis partibus addiderit; adeò patet respirationis necessitas! Verùm quæris quodnam organum respirationi præcipuò conferat? illud sanè quod inspirationi expirationique potissimùm auxiliatur.

II.

VETERES nubem pro Junone captantes, aërem esse respirationis causam existimabant. Neoterici quidam ingeniosiores, nimiumque suis confidentes rationibus, intercostales musculos agnoverunt tanquam respirationis organa; at illorum brevis imbecillitatem arguit; insuper læsis, aut vulneratis, aut torpentibus perficitur respiratio; idem de musculis ad thoracem pertinentibus dicendum est; his omnibus tum intercostalibus costas sublevantibus, tum costas deprimentibus juvatur respiratio, non efformatur. Quidam omnem vim à pulmonibus oriri existimant, sed pulmones passiva sunt tantùm organa, in respiratione non agunt; suscepto aëre ampliantur, thoracem non ampliant. Visne motûs illius benefici & vitalis præcipuam originem agnoscere? repetenda est ab organo forti, elastico, eâ structurâ donato, quod fibris muscularibus elongatis ideòque validioribus constet, arteriis pluribus irroretur, nervorum abundanti propagine corroboretur, firmissimis annectatur partibus; ita denique à Naturâ instructo ut inspirationem & expirationem, alternâ contractione & relaxatione, æqualiter promoveat. En adest diaphragma quod contractione suâ thoracem ampliat, relaxatione imminuet.

III.

DIAPHRAGMA Abdomen à thorace obliquè discriminans; ex Bartholino, musculus est trigaster, ex D. Winslowio digaster tantùm, musculoque supericri & inferiori conflatur. Superior diaphragmatis musculus xiphoidea appendici, extremitatibus ossis & cartilagineis ultimarum costarum & spuriarum inferiori, indèque ultimam dorso primamque lumborum vertebram descendendo attingens, earum corpori lateraliter, suis radiantibus fibris annectitur. Inferior diaphragmatis musculus, fibris in fasciculum collectis conflatus, ultimam dorso primasque lumborum vertebras, versis mediam vertebræ partem amplectitur, eisque veluti inferitur firmissimorum ope tendinum, quorum dexter sinistro longior est. Non hæc sola sunt diaphragmatis retinacula; aponevroticâ & mediâ sui parte pericardio & mediastino alligatur. Motibus exercendis necessarium robur diaphragmati suppeditant nervi phrenici & colli vertebralibus exeuntes, & quidam ex intercostalibus & pari vago ramuli. Aorta inferior, cœliaca, mesenterica, ipsæque intercostales & lumbares, arteriosum effundunt san-

guinem; calorem nutritionemque suppeditaturæ. Residuum resorbetur sanguis, venamque cavam, azygos, subclaviamque attingit. Quâ parte thoracem claudit, pleurâ; quâ parte abdomen, peritoneo obducitur diaphragma. Plurimis insuper patet viis, una versus dextrum latus, venam cavam ascendentem transire finit, atque ita à Naturâ fabrefacta est hæcce apertura, ut illius margines spiralibus constructæ fibris, nunquam ascendentis sanguinis motum retardent; paululum ad latus sinistrum, musculus inferior vel ille fibrarum fasciculus, quem musculum inferiorem vocant, subter centro nerveo (cujus figura trifolii * speciem æmulatur,) fibras disjunctas esse finit ut œsophago transeunti relinquatur via, inde fibræ veluti conjunctionem præoptantes, uniuntur, ut mox bifurcationem efforment aortæ, venæ azygos, ductuique thoracico transitum concedentem liberrimum.

* M. W. inflow.

I V.

RESPIRATIONI potissimum conferre diaphragma ne dubites. Inferioris musculi agentibus fibris, deorsum trahitur diaphragma, relaxatis verò sursum regreditur; superiores diaphragmatis fibræ veluti radiantes & à centro demissæ, costarum margines attingunt, & contractione suâ trahunt costas mobili puncto ita affixas, ut semicirculos majores in contractione diaphragmatis, minores verò in illius relaxatione efforment. Ea est diaphragmatis virtus, ut dum costæ superiùs, pro ampliandâ superiori thoracis parte, ascendunt, inferiores extrorsum moveantur, thoraxque quoad latitudinem & profunditatem amplietur. Nulla datur in homine sano inspiratio, ni vesiculæ pulmonales aëre opportuno turgeant, ut sanguis à majoribus ramis, in minores minimasque ramificationes effluat, ut denique omnia quæque vasa aëris gravis & elastici præsentia compressa, serum expirabile propellant, quod quidem solo contracti diaphragmatis beneficio evenit. Diaphragma ab otiosa curvitate æqualiter ex unoquoque latere recedens, pulmonum expansioni favet inspirationemque efformat. Juvat aëris elasticitas, juvant pulmonales vesiculæ, juvant intercostales musculi, libera datur & facilis inspiratio. At expirationi non minùs conducit diaphragma: pristinum etenim statum recuperare amans, fibrarum relaxatione respectu abdominis concavum evadit; pulmones tumidi sensim sine sensu decrescunt, & subsident, costæ inferiores deprimuntur, thorax imminuitur. Sic diaphragma expirationem conficit, & etiam feriendo utilissimam procreat actionem; aliundè in expiratione duntaxat, tussis, singultus, vox emittitur, & hæc diaphragmati debentur.

V.

INSPIRATIONI quamplurimum conferre diaphragma concedis. At expirationi conducere negas, nulla inquires, nulla musculo in relaxatione datur virtus; attamen cur in dilatatione cordis, cur in illius musculosæ substantiæ relaxatione, sanguini liberior datur aditus? nonne motus peristaltici intestinorum remissio facilem excrementorum descensum finit? Nonne in spasmodicâ diaphragmatis tensione vix lucet respiratio? Quid moror ergo? quid beneficos respirationis usus, diaphragmati non tribuo? Omnia quæ respiratione indigent animalia diaphragmate donantur vel saltem

muscularibus fibris diaphragmatis vices referentibus. Inflammato; vulnerato diaphragmate, turbatur respiratio, languet, Gangrenâ affecto perit. Solo diaphragmatis beneficio spirant ægri quibus omnia jam in agone jacent, diaphragmate excepto. Verùm quisquis inspirantem hominem avido lumine proprius intueatur; in inspiratione tumentem epigastricam regionem, inferiorem thoracis partem veluti ascendentem conspiciat, & agnoscat maximam ex contracto diaphragmate thoracis adesse ampliacionem. In expiratione verò, introrsum veluti regresso diaphragmate, abdomen antea tumidum videre est deprimi & cum diaphragmate expirationi conducere. Hanc veritatem sensit Anatomicorum Princeps, * Postumus respirare, expirare, & inspirare » indefinenter ope diaphragmatis, sive moveantur costæ, sive stent immo- » biles, sive earum ascensu diu ampliatum maneat thorax, sive tandem co- » stis ipsis quiescentibus, thorax constringatur, diaphragma suam semper » exerit virtutem, ... & paulò superius, * diaphragmatis præcipui & sin- » gulares usus sunt thoracis dilatio & constrictio undè cum tanto Au- » thore concludere licet:

* M. Winslow.
exp. Anat.
p. 1187.

Idem.
p. 1165.

Ergò præcipuum respirationis organum Diaphragma.

DOMINI DOCTORES DISPUTATURI.

*M. Anna-Claudius Do-
rigny.*

*M. Petrus - Augustus
Adet.*

*M. Michaël - Josephus
Majault, antiquus Re-
gis Exercituum in Ger-
maniâ Medicus.*

*M. Ludovicus-Joannes-
Baptista Cosnier, Chi-
rurgia Professor.*

*M. Jacobus Barben du
Bourg, Regie Scientia-
rum Academiae Stokol-
mienfis & Societatis Re-
gie Monspeliensis Socius.*

*M. Antonius Ferrein,
Professor Regius, Re-
gie Scientiarum Acade-
mia Socius & in Horto
Regio Anatomies ac Chi-
rurgia Professor.*

*M. Hugo Capet, Biblio-
theca Facultatis Præ-
fatus.*

*M. Joannes - Jacobus
Messence, rei Herba-
ria Professor.*

M. Bartholomæus Murry,

Proponebat Parisiis JOSEPHUS PHILIP, Intervallæus - Glandæ-
tensis, Doctor Medicus Remensis, necnon Saluberrimæ Facultatis
Medicinæ Parisiensis Baccalaureus. A. R. S. H. 1762.

A SEXTA AD MERIDIEM.

Typis Viduæ QUILLAU, Universitatis & Facultatis Medicinæ Typographi, 1762.